

聖宋名賢五百家播芳大全文粹卷第六十五

釋疏

聖節

興龍節道場疏

李樂靜

律當大呂潛通夢日之符月應上弦燦發流虹之瑞篤生真聖元  
契昌期恭惟 皇帝陛下秉哲自天繼明當極對三靈之休眷席  
六帝之丕圖叙陰陽風雨以成和媚祖考神祇於安樂萬國熙洽  
一歸下武之繼文百姓謳歌欣見重華之協帝俯迎誕節大啓法  
筵敢憑天竺之文上祝南山之筭伏願神通十號共扶不拔之基  
壽考万年永據无疆之福

乾龍節道場疏

劉夷叔

仁孝二稱幽明所覆祈延一意君子則然 孝慈淵聖皇帝陛下  
伏願神聽靖共天從格保闕帝齡之所界共僧劫以難量天子無  
心縱適九夷之陋周王念國終期八駿之歸

乾龍節開啓疏

任子淵

六位時成爰紀誕彌之慶万邦作人嘗蒙覆露之恩先即梵宮肅  
陳秘典 孝慈淵聖皇帝陛下伏願茂膺神筴申錫夢齡海上瑤  
霞亟返函池之御天邊樓觀表增花萼之輝

乾元節開啓疏

玉曆垂鴻啓千齡之誕序金言蒲義倡諸佛之真筌庶嚴最上之  
因庸保無疆之祚恭惟 皇帝紹天景命持國永圖吉明輝虛闊  
希德惠浸于遐末厲乘離之首氣紀鳴社之初期昭文相公史館  
相公集賢相公參政侍郎謨九德之中翊万機之會慶儲靈於若  
水擬頌聖於華封廣披法藏之文大集祇園之供雨花零座潮梵  
騰音覺塵趣之普迷成度門之絕品 皇帝伏願如天之壽如日  
之升七寶千重永護玉皇之相衆星北拱長扶紫極之尊相公參  
政伏願與國榮華俾民萬壽任常專於柱石功早載於鍾彝然後  
願霑勝利於有生決太和於無外

天寧節功德疏

孫仲益

穆清受命肇興出震之祥曆數在躬茂對卜年之永矧自璇霄而  
撫世紹膺鴻號之長生共惟載肅之辰重視無疆之壽伏願丕承  
景祚增錫純禧時乘六龍接統千歲皇天佑于一德克享神休夢  
帝與我九齡永為民主

天寧節功德疏

鮑欽正

儲精御極實膺出震之期弥月開祥敢効後天之祝歸依淨境演  
譯微言庶憑上乘少報帝力 皇帝陛下伏願垂衣而治如日之  
中為天下君以幸難逢之會使聖人壽益延無疆之休長發其祥  
紹隆於聖緒誕弥厥月襲慶於休辰仰奉至言用形延祝 皇帝  
陛下伏願鴻圖有永景命惟新占南極之老人有光其應同西方  
之壽佛無量斯年

天申節道場疏

執徐肇歲再逢甲觀之祥梵梵宣声虔啓樞庭之會跪瞻調御恭

祝壽祺伏願申錫無疆聿懷多福靜柝克寧於榆塞包桑永奠於  
蘿圖太乙儲祥浹靈休於四海媒神錫羨縣景貺於多男

天申節道場疏

蕤賓紀律俄屆長贏之期華渚流星載遇誕辰之宜恭伏竺乾之  
侶虔持方廣之文義克謹於在三福可祈於時万 皇帝陛下伏  
願赫赫在上穆穆迓衡四圍不從算於煙塵九朝坐安於磐石明良  
庶事端合臯陶之歌富壽多男願效華封之祝

興龍節道場疏

信義在躬已協天人之助乾坤莫報更資覺法之因爰屆誕期用  
伸至願 皇帝陛下伏願憑覺皇之外助効臣子之内心如河海  
之靜淵與天地而長久

興龍節功德疏

蘇子瞻

上帝垂休真人誕降乾坤合契永為喜慶之辰草木何知舉有欣  
榮之意矧惟遭遇獲侍清閑不緣梵釋之因曷致涓埃之効伏願

皇帝陛下受天之祿如川方增奄有漢唐之封疆億萬唐虞之壽  
考永均介福下及函生

乾元節功德疏

炎精格德有開千載之祥海藏緡文式暢諸天之蘊表崇因於衆  
善期輯福於皇嗣恭惟 皇帝陛下纂祖丕基欽天明命仁恩之  
厚浚鼓舞於涵生風化之醜率甄陶於殊類屬應期於華渚溥歸  
祝於丹宸樞密相公樞密給事樞密侍郎韜經邦之謀履當軸之  
任祇園敞會歎有相之莊嚴靈鷲傳音締無盡之功德 皇帝伏  
願德如天覆明並日升萬玉趨庭長接塗山之會七珍圍座永居  
沙界之尊樞密相公太行給事侍郎伏願炳鍾彝之勳隆柱石之  
寄輔長世之休業享上天之百祥然後願車書所同霜露所墜共  
嬉昭且咸集殊休

乾元節功德疏

宋子京

夏管凝薰月樞幾望是惟穀且載育冲人徇歡戴於群情用題名

於盛節然且上欽列聖仰荷先慈顧復眇躬纂承丕祚交欣懷而  
罔寘惟正妙之是依用飭先期克嚴普供玉題開宇潮偈宣音庶  
歸報於自生兼蒙仁於俾艾清場祗被大覺照臨

天申節道場疏

鄭民望

流虹飛電幸逢五百歲之期就日望雲頤上十萬年之壽月將臨  
於穀且誠敢達於榮章共惟 陛下德同乎初心游於淡天高地  
厚固繇延有永之基松茂竹苞極悠遠無疆之筭

天申節道場疏

化國日舒以長正薰風之入奏天子父尊之至慶彌月之將臨敬  
修最上之乘仰祝無疆之壽共惟 陛下受五日一朝之養符三  
呼萬歲之祥汗竹南山莫紀聖功之大桑田滄海未傾壽筭之深

乾龍節道場疏

葛謙白

鳴里社以協祥適冠長羸之候啟法筵而伸悃敢憑調馭之慈共  
披海藏之文用介河沙之筭 孝慈淵聖皇帝伏願三靈孚佑十

力護持造父執鞭還駿珍於漆澤廣成傳道超壽量於空同

乾龍節道場疏

葛謙白

祥標虹渚載逢震夙之辰咀暢魚山將散祝筵之會再哀一衆恭  
禱萬年 孝慈淵聖皇帝伏願保合大和緝熙純嘏星廻日轉早  
還法駕於具茨地久天長永奉宸歡於花萼

聖節道場疏

鄭厚

誕彌厥月開虹流電掃之祥於萬斯年獻地久天長之祝仰憑頤  
力同贊睿齡 皇帝陛下伏願質曆長新羅圖益固修文偃武兼  
綏夷夏之民拱手垂衣永作神明之主

承天節道場疏

李樂靜

妙覺能仁出現於大千世界深慈救物宣說於十二部經形悲智  
以悟群生示辯才而持正法龍宮海藏爰祕於金文東夏南閩式  
傳於像教所以植衆德之本結淨土之緣趨三寶以皈依發一念  
而廻向六時讚頌克成上善之因四事恭勤用廣有為之福伏願

皇帝金輪益固玉葉彌芳躋大德以庇民推至仁而御宇深信內典入不二之門安住佛乘享無疆之壽永保後天之筭長爲諸夏之尊然後願寓縣承平類四禪之清淨朝野多慶蒙百福之莊嚴止戈載洽於昌期拂石莫量於浩劫凡居法界盡證菩提

承天節道場疏

六通應供從兜率以降生三藏契經假貝多而流布所以作群迷之歸救述大事之因緣自夢叶於金人始俗傳於像教香花四事式重於焚修鍾梵六時聿嚴於齋供爰植無邊之福用成衆善之因伏願 皇帝位等金輪功周妙界道齊十佛澤被四生邊陲載戢於五兵府庫常盈於七寶御世比能仁之福統天同大梵之尊八部歸依六戎款附華封祝聖克隆萬壽之期震且興王永護一乘之法然後願朝野多慶興禮樂於三雍寓縣無虞息煙塵於四鄙載洽淳熙之化同躋富庶之鄉凡在含靈並登正覺

乾龍節道場疏

汪彥章

祥開甲觀將臨震夙之期會啓樞庭預慶延洪之祝諷三乘之密記演九籥之真科恪傾寸誠懋祈景貺 皇帝陛下伏願與天無極如日之升惟聲長浹於東朝妖祲永消於北女九功惟叙欵五福以錫民萬歲成純奉三無而勞下

天中節道場疏

篤生元聖天申命而用休虔祝万年臣歸美以報上廣延開士恭締法筵庶憑諷頌之勤式薦篚鴻之祉 皇帝陛下伏願景命有僕受福無疆常陳泰階之六符不用天山之二箭何知帝力永聽康衢之謠請壽聖人長享華封之祝

興龍節功德疏

汪彥章

璇曆儲休夙啓千齡之運慈囊紀節爰均萬國之歡雖遙汾水之遊敢後華封之祝共惟 皇帝陛下性率恭儉德兼文武文自傳序於祖宗即軫憂於宵旰力收群策銷禍變之胚胎躬蹈危機拯生靈於塗炭方人心之爰戴忽天步之艱難左祖雖堅北轅莫駐適

遇流虹之節尤深向日之誠是仗勝因仰資鴻筭伏願 皇帝陛下顯膺景命光復丕圖脫陽九非常之災享大千無量之福瑤池宴畢御八駿以遄歸姜里書成用六爻而致治

乾龍節功德疏

鄭厚

金風雖長火德未衰序協正陽運符元后宸庭稱壽義方篤於呼三帳毀蒙塵厄尚淹於陽九曰士曰庶且喜且悲藉佛力之無邊贊皇圖之有永三光復彩翠華旋沙漠之征方國同声香火副華封之祝

乾元節滿散疏

宋 子京

若水開祥契上聖千年之運祇園修供資能仁眾善之因恭憑無量之福田仰祝延鴻之眷筭伏惟 皇帝陛下躋元行健累洽重熙荷靈命之睠懷迪先謨之懿鑠昭德而誕膺純錫敷文而交奉上儀在璿克集於歲功鳴社爰臨於誕節万邦咸乂九叙惟歌某官翊亮天工協宣皇極率厲同寅之至克申順美之誠當華渚之令辰獻堯封之善祝躬趨寶刹特啟淨筵四事香花羅寶階於堦率六時鍾唄演梵唱於魚山繫勝果之圓成佑鴻基於悠久皇帝伏願宸居樂豫壽域歡康固守位於金輪齊十年於沙劫法雲溥蔭將德澤以長周慧日揚輝等皇明而又照某官伏願茂膺戲福益顯嘉庸弥宣調鼎之勳上贊垂裳之治然後願寵均朝著恩浸寰區官師咸罄於忠規黎獻並躋於富庶大包瀛表細及昆跂仰沐加持同茲饒益

天申節道場疏

祥開甲觀恭逢震夙之辰會啟祇園共獻延鴻之祝設伊蒲之淨供繡貝葉之真誥庶仗誠忱式資孚佑 皇帝陛下伏願赫赫在上穆穆迓衡則百斯男縣本支而有永宅三有俊輔宗祐於無疆

天申節道場疏

五百年而有作天開甲觀之祥三万歲以成純久效華封之祝輒

歎淨宇恭締法筵庶仗齋薰仰祈昌熾 皇帝陛下伏願三神孚佑四海會同邊廷無振柝之虞寰宇叶維魚之夢既多受祉享穰穰簡簡之繁則百斯男鍾螽蟄繩繩之夢

聖節道場疏

流虹輝渚感聖緒於昌期貝葉翻文輯覺緣於衆妙敢資法力上薦皇休 皇帝伏願光御帝符長綏邦祚恩若慈雲之覆德如慧日之升萬善觀心已會祇園之果千齡祝聖更同嵩嶽之呼

會慶節道場疏

孫仲益

蘭殿儲祥慶千齡之會祇園薦祉罄方國之歡伏願 皇帝大寶齊斗極之高丕基侔盤石之固汗南山之竹紀莫大之功勳閱東海之桑介無疆之壽福

天申節道場疏

火德運而啓造周興王之業夏日至而肇生商立子之符草偃舜風葵傾堯日伏願福祿之盛如川方增功德之隆與天無極車同

萬里陪西池阿母之游統接千齡應南極老人之瑞

天申節道場疏

孫仲益

火流周室而肇興王之迹風入舜弦以開受命之祥王坐傳觴千官列侍寶坊脩供萬德同音伏願追五帝之高蹤邁三王之遐躅降年有永見黃河千里一曲之清受祿無疆聽嵩嶽萬歲三呼之祝

天申節道場疏

星火開祥當聖神誕毓之旦寶坊延祉罄臣子虔祝之心共惟光堯壽聖太上皇帝陛下道法自然心游邃古藏雷聲於淵默順帝則於希夷伏願日新又新既朔復朔超大椿八千之筭爰久視以長生符靈芝三萬之期配高明而博厚

乾元節功德疏

王望之

天佑祖宗之仁克肖其德世錫聖神之嗣全付有家應交泰之亨期萬純乾之令月仰憑佛力上祝堯年共惟 皇帝陛下性自聰

明德惟恭儉雖狂虜之外侮寔大運之中興伏願睿智有臨干戈  
載戢鬼方遠遁克不待於三年崧嶽懽呼聲屢聞於萬歲

天申節道場疏

祥開甲觀天申命而用休壽祝南山巨歸美以報上廣哀梵侶恭  
締法筵輒申髦之誠用禱穰之福 皇帝陛下伏願與天無  
極如日之升二邊無飲馬之虞四海有夢魚之樂聲傳萬歲永符  
嵩嶽之呼慶浹多男願効華封之祝

天申節道場疏

葛謙白

襟祠飛乙既諧弓韜之祥華渚流虹允協電樞之慶恭逢華旦  
申祝壽祺 皇帝陛下伏願受福無疆降年有永康衢擊壤咸  
臻莫枕之安邊圉橐弓永享垂裳之治

天寧節功德疏

祝咨謀

月紀應鍾允屬昌明之運星流華渚篤生神聖之君豫啓祕庭增  
延淨侶仰企紫霄之御恭披玉笈之文伏願 皇帝陛下命與天  
長業同地廣擁三靈之密祐歛五福以敷施一人慶而萬國咸欣  
百和焚而列真洞鑒躬聞至道獨高黃帝之風富有昌齡願効  
封人之祝

天寧節道場疏

王望之

清河九曲允彰兆聖之符靈嶽三呼實表歷年之命爰即神明之  
宇且嚴道德之文庶假勝因益崇睿筭伏惟 皇帝陛下至仁天  
縱盛德日新大安大榮福等崗陵之固時邁時億壽齊箕翼之  
長下及含生共均休祉

天申節道場疏

孫仲益

炎正肇卜年之永朱明紀彌月之祥凡我有生舉同是日俯申洪  
願仰叩真乘伏願繼明如日之升立極配天之大獻華封人之善  
祝齊南山之壽不騫集阿蘭若之妙因等西方佛之無量

天申節祝香疏

前人

赤伏題五德之期皇業紹千齡之統日從北至偕化國之長風自



南來共楚臺。快盍申善禱用扣真乘伏願。光堯壽聖太上  
皇帝陛下名高寶地千佛之經位冠玉京羣帝之首按八龍轡而  
捐金母於瑤池之上駕五雲車而摩銅人於霸城之東方期汗漫  
之遊又見蓬萊之請

天寧節道場疏

前人

穆清受命肇興出震之祥曆數在躬茂對卜年之永矧自璇霄  
而撫世紹膺鴻號之長生共惟載肅之辰重視無疆之壽伏願丕  
承景祚增錫純禧時乘六龍接統千歲皇天佑于一德克享神休  
夢帝與我九齡永為民主

乾龍節道場疏

李伯時

候正六陽羣目仰虹流之慶期先一月庶工紛齧抃之儀茂簡上  
帝之心敷聽輿人之誦共惟 皇帝陛下聖猷天縱威令風行主  
壺青宮剛乘一素之震握符紫極明開兩作之離曾為有道之曾  
孫且享無疆之大歷肆披藻笈及祗替維圖綿三萬里之唐封用  
茲宏貴過七百年之周卜永孚于休

天寧節功德疏

李伯靜

天幹三辰歲分六甲水生一而利萬物土居中而行四時屬陰陽  
參合之期為仁聖本元之日是用即琳宮之福地啓金籙之祕文  
有德者昌且神靈之交相歸報於上乃臣子之至情伏望上帝鑒  
觀衆直感格護太清之高拱擁多福以來宗三百六旬每周流而  
不息千萬億歲當永保於無窮

乾龍節道場疏

律中蕤賓時方盛於火德虹流華渚天復生於聖人敢傾有截之  
心仰祝無疆之祉集六和之開士翻五經之祕文虔仗佛乘延鴻  
壽筭伏願 皇帝陛下孝友光于虞舜聖神叶乎帝堯文德誕  
敷坐致兵戈之偃息声教四暨更看車書之混同永與含生共躋  
聖域

會慶節功德疏

孫仲益

莞寢諸休瑞玉紀生商之候牢祠錫羨倚蘭開胙漢之祥凡在  
照臨舉同慶賴伏願弓裘棗戢粟腐錢流驗泰階六符之平昇  
壽并倫九疇之叙農桑三萬里而永燕蘿園之固春秋八千歲而  
允符椿壽之長

聖節功德疏

黃魯直

電影旋樞瑞氣昔蟠於穹壤葵心向日頌聲播溢於華戎躬詣寶  
坊廣延緇侶致上方香積之饌閱西竺貝多之文罄竭愚衷崇修  
法供伏願 今皇帝陛下睿圖鞏固宸筭增隆日月無私煥天明  
於萬國椿松共茂班寶鑑於千秋臣無任

後苑同天節道德疏

王岐公

皇運當天享君聖元之大奉正陽表朔紀載誕之殊祥即翠苑以敷  
筵諷金文之滿義寶資勝福永祚昌期

聖節道場疏

鄭厚

惟天爲大均蒙覆育之恩如日之升感慶誕弥之節恭依道梵仰  
祝帝齡伏願 皇帝陛下齊久二儀並明兩耀由中及外第申百  
福之章式舞且歌長奉千秋之燕

天申節道場疏

前人

承承繼繼幅員嘉長發之祥鬱鬱葱鬱龍虎擁蔽會之氣式時欽  
致厥月誕弥歛敷佑于帝齡宜欽依於佛力一人有慶四海無虞  
澄紫羅之妖氛復黃圖之仙仗乾坤再造續綿曆而日新日日新  
臣庶文懽撫宏沐於萬歲萬歲

天申節道場疏

前人

日離東井欣逢載夙之辰龍起昆陽高啓中興之祚篤 皇家之  
再造僕景命之萬年注倚能仁維持熙運商立膺錄契靈武之  
昌期吳會揚麾溢春陵之嘉氣慶爲民爽其壽與天齊

乾龍節道場疏

葛謙白

乘乾載誕節復屆於以銅宣梵乞靈福每資於繡貝敢列齋薰之  
品用伸悃幅之誠 孝慈淵聖皇帝伏願何福不除其寧惟永配

盤古繇延之數參萬歲以成純挺金剛堅固之身同三光而不老

天申節啓建道場疏

林 豈塵

景回北極慶流虹繞電之祥壽祝南山傾就日望雲之衆共惟  
光堯壽聖太上皇帝道存澹泊妙契希夷付黃屋於非心詒燕謀  
於翼子雖宥天下不治天下固已仰成然嘻聖人請祝聖人可無  
歸報况值誕弥之月仰憑高上之慈伏願百祿是道五兵不試想  
聞中岳沸傳三呼萬歲之吉難老後天長享五日一朝之制

天申節滿散疏

不為天下先默定老聃之道請祝聖人壽難忘堯帝之仁恭即璇  
宮仰祈睿筭共惟 皇帝陛下太上貴德神人無功付黃屋於非  
心享玉卮之為壽矧值流虹之月共傾戴日之心伏願受福無疆  
景命有僕十四月而生帝已際昌辰八千歲以為春莫窮神策

聖節道場疏

紫電流輝慶一千年之嘉會紺宮禱福咨三十日之妙錄用資北  
闕之昌期爰賴西乾之惠力恭惟 皇帝陛下欽承禹道克廣文  
声睿智有臨履至尊而制六合神武不殺惠中國以綏四方其著  
顯庸自貽哲命茂迎令節祇款慈容佛日當中請祝聖人之壽堯  
雲在上對揚天子之休

天申節道場疏

韓 駒

職在禁途雖有愛君之意身居祠館實無報國之方惟冀覺慈俯  
從誠烟 皇帝陛下伏願壽踰時億光照大千拱手垂衣永御浚  
都之宮殿投戈散甲盡朝沙漠之戎羗更推諸福之餘下逮四方  
之遠

聖節功德疏

鄧 志宏

繞樞布瑞肇開萬世之祥流渚呈輝允協千齡之運將臨令節回  
向真乘潔滂塞之珍羞演金僊之奧典冀憑梵力庶獲妙因伏願  
皇帝陛下聖壽無疆遠比南山之永蘿圖益固常齊北極之尊  
聖節滿散疏

皇皇后帝佑下民而作之君勉我王有大德而得其壽按瓊笈  
銀題之教延鳳姿日表之年共惟 皇帝陛下乃聖乃神克明克  
類體堯蹈舜而立綽然有餘裕哉降周迄孔以來皞皞乎不可尚  
已當乾健龍飛之會實華乎虎變之辰恪啓北極之尊共效南  
山之祝景命有僕方父先而子從受福無疆固天長而地久

聖節開啓疏

張 嵇仲

寶曆會昌麟輪降格闡洪猷於億載錫純嘏於綿區惟上帝之頌  
懷眷大君之欽翼爰崇令節式紀殊休啓堯率之祇園結如來之  
妙果仰憑正覺聿奉成因陳十地之香花會五天之龍象 皇帝  
伏願金輪演化玉燭宣和堯齡永固於南山禹會常趨於北闕

聖節滿散疏

帝出乎震顯逢千載之期道兼於天丕格三靈之眷率彝儀於闕  
若紛善頌以茲頌共惟 皇帝陛下齊聖廣淵剛健篤實恢張政  
紀用奉若於先王褒對神休裨緝熙于純嘏方御乾龍之居上永  
享豐照以宜中申衍遐齡寅寅定力受命不殆蓋將以天地為常  
與物皆昌豈特若松栢之茂

會慶節啓建道場疏

林 豈塵

天佑民而作之君慶誕弥於良月臣歸美以報其上繼善頌於封  
人敢伸一介之誠願祝大椿之壽共惟 皇帝陛下道參義昊德  
配乾坤執虞舜之兩端躬武王之達孝坐撫中熙之運肇開長發  
之祥臣等謹叩高真仰祈遐筭伏願後世難老永符萬歲之呼如  
日之升長對千秋之節

會慶節蒲散道場疏

虹流電繞肇基長發之祥地闢天開大啓中興之業仰祝尾鴻之  
祚輒伸螻蟻之誠共惟 皇帝陛下孝通神明道參覆載會文武  
父子而處慶堯舜曆數之傳臣等謹詣琳宮虔修雲笈伏願壽齊  
箕鬯業等山河漢室重光增授泰元之筭周家過歷永占邾邠之  
龜

天中節功德疏

任子淵

接千齡之正統為天下君傾四海之歡心使聖人壽敢因盛日祇奉真乘庶憑梵釋之因少効涓埃之報 皇帝陛下伏願順帝之則先天不違受祿無疆如大川之方至降年有永配南極以彌光

天中節功德疏

鄭明舉

為天下王允屬守成之運使聖人壽溥騰歸美之歡寸葉傾陽涓流宗海熏妙因於有慶絲綉胥筭於無疆恭惟 皇帝陛下叙功覺民績志敷極文思格于上下孝悌通于神明集命應期發祥標曰萬物覩而咸遂四方貨以交欣伏願日升月常同照臨於不息天長地久並覆載於自然

天中節道場疏

韓子蒼

聖神臨御得率土之驩心梵釋興慈副羣生之願力敢憑聖果助祝蕃釐伏願 皇帝陛下壽與天崇福踰地厚時乘大路肅迎二帝之歸奄治中區永受百蠻之貢丕圖益固庶品均安

天中節道場疏

鄭明舉

生德倚蘭符上天之景命翻文具葉資秘洞之靈科庸竭微誠仰申善頌共惟 陛下伏願道參化育德協古初聲億兆民之心齊上華封人之祝享千萬壽之壽長為天子父之尊

天中節道場疏

星樞感聖慶符休運之期海藏翻經欽奉真乘之教斬同率土仰祝後天共惟 陛下伏願穆若無為超然高蹈祥開穀日篤周祐於萬年慶衍羅圖燕商孫於百世

天中節功德疏

汪彦章

甲觀開祥方嗣無疆之歷梵宮營福或憑大覺之慈載逢彌月之辰歲整後天之祝 皇帝陛下伏願紹恢大業永御丕圖縣帝力以常新齊佛壽之無量下年過歷方同周室之興致治以仁遠邁堯齡之永

乾龍節功德疏

真主應期鍾正月純陽之氣羣臣歸美祝後天難老之祥方清蹕  
之在行宜神明之加護爰即金仙之館共繙貝葉之文伏願 皇  
帝陛下善保清躬少湏休運與襄城之衆馭亟問迷津取赤水之  
遺珠再臨大寶

聖節道場疏

張 愁仲

鳴社告符流虹布瑞啓太平之景運開上聖之殊祥式在嘉辰宜  
形善頌即金僊之寶刹探貝葉之直奎庶憑西土之勝因仰祝南  
山之睿筭伏願 皇帝陛下丕圖增永寶祚無窮邁成周過曆之  
期叶夢帝與齡之兆一人有慶聲海萬壽無疆與宗桃  
而共爰

聖節道場疏

宋 子京

薰風協序寶月向盈記祥虹華電之期著金鑑露囊之盛虔趨福  
地大啓真筵聲朝野之懽忻集人天之瑞福共以 皇帝陛下茂  
方陞順頌佳辰夙標聖旦旅貢琛而展慶粲鄰玉以伸歡某官襄  
贊大猷翊宣至化欣誕彌之佳節集景貺於羣倫哀對梵仙宣揚  
祕典光闡佛乘之最上迎天筭之遐伏願 皇帝湯德逾新堯文  
增煥九河開奧五緯循纏綿周億載之期長奉萬年之慶鋪昭惠  
命永庇含生某官伏願穆景三階凝和九鼎並翊帝猷之亮交隆  
國棟之華然後願鳴玉翠鞋藹藹贊清寧之運游童逸老熙熙樂  
仁壽之場

聖節滿散疏

國家寶祚綿長洪基丕固惟正陽幾望之旦乃元后克生之辰列  
辟投誠百靈薦祉延梵宮之開士集淨會之良因上奉至慈永臻  
純嘏帝圖累盛益隆百順之祥睿筭無疆共罄萬年之頌傾虔懇  
祝倍萬常均

天申節功德疏

劉 夷叔

嵩呼萬歲聲聞者三河出九疇嚮用曰五典吾君之必壽誠聖業

之至情茂對圓穹式敷淨供 皇帝陛下伏願授天增策弼我不  
基負黼袞而朝諸侯下江海以王百谷家人上壽永瞻長樂之慈  
顏鄰國交歡無復甘泉之屯騎

聖節開啓疏

汪彥章

炎帝執衡允協中興之運昊天申命誕開長發之祥肇萬宇以傾  
心望九重而伸祝矧叨禁從敢後封人 皇帝陛下伏願萬福來  
求五兵不用河如帶而山如礪盡復漢疆天為蓋而地為輿永房  
宸極

天申節功德疏

劉夷叔

東方有佛昧者不知南面垂衣於此即是救百萬生靈已迫之命  
豈一二筭數可知其功敢因休辰輒論聖筭 皇帝陛下伏願雲  
仍媚似之國螻蟻彭聃之年心廣體胖豈待數數而致福天長地  
久自然蕩蕩以難名更推六氣之和用集百嘉之慶

聖節道場疏

葛謙白

五百年而有作天開甲觀之祥三萬歲以成純人效華封之祝輒  
款淨宇恭締法筵庶伏齋薰仰祈昌熾 皇帝陛下伏願三神孚  
佑四海會同邊廷無振柝之虞寰宇叶維魚之慶既多受祉身穰  
穰簡簡之繁則百斯男鍾執執蠶繩繩之慶

聖節道場疏

林光塵

四月維夏千齡開炎曆之祥一人出真萬國仰電樞之慶夙涓梵  
宇虔命緇流課竺土之秘文効華封之遠祝伏願 皇帝陛下神  
功獨宰聖德日躋泰道方開早回鸞駕於西極夢齡永錫長比筭於  
南山

太皇太后生辰功德疏

王岐公

純坤紀月萬慶誕之嘉辰五竺繙文起真乘之上福敢歸虔於淨  
教用助廣於勝緣 太皇太后伏願萬壽天隆百禩雲布陰功助  
化常扶邦祚之安徽德流音永播工詩之首

皇太后生辰功德疏

前人

金行肅氣適標載誕之期玉相分毫能現無方之化虔敷梵席廣  
繹貝文庶憑最上之緣以續無疆之筭 皇太后伏願等法輪之  
固同慧日之升海藏騰音已集祇園之果仙花覆坐永居長樂之  
尊

皇太后生辰功德疏

愛日臨郊應帝衡之初序祥雲覆戶鍾母道於昌期預被禁楹具  
嚴寶供終仰大慈之教當垂外護之仁

皇太后生辰功德疏

相慈之厚方致養以盡誠慧力之通皆應緣而起福紀誕祥之嘉  
序開梵席於禁楹大錫壽祺永歸覺利

皇太后生辰功德疏

長律首宮微陽施種爰啓玉衣之瑞有昭彤筦之徽象寶供於龍  
華發妙音於猊坐庶導續齡之祉永經同體之符

皇太后生辰功德疏

歐陽永叔

坤德流徽式臨於誕日具文宣妙恭仰於巨慈載嚴秘邃之庭駢  
集清修之侶冀資福壽時啓靈場伏願毫相分光法雲假陰憑茲  
勝利永保遐齡

皇后生辰功德疏

塗山啓夏邦家必本於閨門封人祝堯巨子各伸其忠孝敢因慶  
旦恭演秘函憑最上之妙因祈無疆之遐筭 皇后陛下伏願降  
年有永如月之明承天而時行懋著徽柔之德眉壽無有害永光  
熙洽之朝



聖宋名賢五百家播芳大全文粹卷第六十六

疏

國家祈禱

南郊相國寺開啓祈恩道場疏

王岐公

誦辰長至脩報上圓因三歲以薦誠盡九州之助祭仰企覺慈之  
蔭善成涵識之因密相鉅儀來綏百順

南郊相國寺開啓祈恩道場疏

肇膺邦緒荐習歲祥適用天正之辰以修郊禋之事仰太慈之能  
力濟萬識於有緣協底丕成均錫羣祉

南郊開啓祈恩道場疏

蔡君謨

奠玉紫壇虔修於大報布金紺字特仰於能仁用集妙因時嚴法  
供 皇帝陛下與天均覆維日並明運神化以無方置幅員之安  
處甫臨至節專講上儀就吉位以薦誠霑渙恩而澤下有來清侶  
敷誦祕文式救殊緣冥資熙事伏願五神協序百福凝祥永隆久

大之基益固延鴻之筭

南郊禮畢齋疏

宋 子京

冬物告成因享親而達孝神釐來貺既均慶之以時惟盛禮之弗  
違荷巨慈之旁祐即靈場而申報異宜鑿之孔昭薦此神明期于  
福應

明堂預告泗洲普照明覺大師道場疏 王歧公

國家躬三歲之祠會五精之氣因嚴以教人之孝反始以為民之  
祈瞻勝迹之有來濟能仁之無盡告誡先事垂保後祥

明堂禮成開啓謝在京諸廟道場疏 王歧公

考古事帝感時念親汔于告成宜弗違禮歸大慈而締果荅幽監  
之助祥有託至忱更孚來應

太皇太后景靈宮祈福道場疏 蘇 子瞻

仁心浹物自然憂樂之同孝治格天宜示感通之速庶殫精懇仰  
叩上真恭以 太皇太后陛下保佑聖神勤勞夙夜偶眷東朝之

御未復太官之常爰即殊庭大陳妙供法音上達雖有假於雲章  
民志下同自不勞於祕祝願膺勿藥之喜永保無疆之休

太后禳災疏 唐 子西

比以坤慈愆於日晡雖宮闈之茂慶神所扶持然方技之未工心  
焉飢渴敢輸至懇仰扣能仁異秉慧力之雄永保徽音之固及親  
桑之令序膺勿藥之殊休

公主禳災疏 宋 子京

竺聖流仁神華介祐顧惟孺婉頗厚慈憐雖姆嫫之謹承加椒闈  
之勤復屬茲敲緼尤慎保頤已詔寶坊恭陳法帶金言徧釋花裊  
旅臻異惠命之廣敷續壽詩祥之綿熾仰惟靈照垂宜精衷

龍圖天章寶文閣開啓年交道場疏 王歧公

寒布水行識歲功之畢就和生玉律迎天序之將新碩承皇極之  
尊歸奉大慈之教肅西清之祕宇諷天竺之靈文幾緣勝事之脩  
溥下時祥之應

年交祝聖道場疏

孫仲益

還相之律甫畢於歲功普覆之仁仰依於霄陰矧嶽靈之下底居都會之上游爰建清場聿申精意玉書金簡交罄誦持桂百蘭馨第勤修薦願綏寶祚庸及生民

集賢殿正旦道場疏

孫夢得

月就初次星移故纏萬物勾萌百嘉擁集載嚴林九事爰肅宸庭參諷祕言仰祈直監袞袞於率土蕃禧福於生民惟法是依與時而永

慶寧宮保夏道場疏

王歧公

時迎仲夏功秩南訛太陽赫曦而流空盛氣煩鬱而被物夙啓禁楹之會歸崇佛果之修庶格至虔以導嘉祉

集英殿保夏道場疏

炎煒御及煩暑者被物廼肅祕殿以崇梵筵披白鳩之真文禮青蓮之妙相仰憑法力不擁善祥下逮涵生畢霑勝果

翰林院開啓冬節道場疏

王歧公

歲功就緒天統復元夙嚴省戶之司具法祇園之供梵音振席慧景延空庶迎嘉序之新常獲善因之助

內中延福宮開啓祈福道場疏

顧以眇躬嗣于丕禘念萬幾之叢脞懼五事之失中緬企正覺之乘會歸妙智之力庶緣勝利永輔皇休

禁中祠下集福道場疏

孫夢得

至神惟默下土是依矧惟靈祠實寓禁宇當清和之標序屬煩燠之啓期時建清場誕揚真誥伏願袞袞除災咎延萃吉休普使群生並歸密蔭

垂拱紫宸兩殿祈福道場疏

王歧公

歲律凋陰春郊叢緝念繼明於皇序思殖福於涵生玉殿敷筵金文諷義庶妙乘於佛果庸不輯於邦休

寶相院為民祈福道場疏

氣肅西方畢收羣彙教流震旦有覺能仁禮妙相之垂毫繡諦文  
之滿義願承休於丕緒願霑福於涵生永念至心普依惠果

為國祈祥華嚴齋疏

邵公濟

遇災而懼法固許於祈禳求福不回禮實存於禋祀頃以邊隅之  
倣擾致茲民堵之震驚冀上帝之寵於四方俾治國之生於百樂  
惟有佛乘之妙力能消劫運之妖災况十二部經莫重華嚴之大  
典而三千世界載於香水之淨輪按前哲之軌儀陳此時之供獻  
上以延鴻國家之景祐下以增崇鄉黨之多祥人各保於安寧家悉  
臻於吉慶共惟普賢菩薩之行願種種莊嚴毗盧如來之光明重  
重涉入奉少花少香者悉同九會河沙之眾預一瞻一禮者如在  
七寶樓閣之中願力普薰善心昭格伏願聰明元后益隆鞏固之  
不圖陰隲下民各保懋遷之常產戢干戈而橐弓矢說禮樂而敦  
詩書蠻夷率從中外禔福

龍圖天章閣開啓祈皇子催生道場疏

炎律布生靈稊占慶啟林苑之妙供披寶藏之諦文聽法下千諸  
天傳香震於四座願慈悲之慧力導因報於真期不序早隆至心  
永嚮

寶生院開啓祈皇子催生道場疏

夙以瑣德獲纂厥成永惟元儲尚虛所屬維黃金之蒲界有白玉  
之垂毫仰締妙緣普歸法力庶承休於大統畢濟望於羣生

福壽院塔下開啓祈皇子催生道場疏

守邦之重久託於皇居主器之良未開於東學維華倫之初集固  
羣靈之所扶肅啟淨場諦修妙果惟願寶光臨燭法力護持早承  
宗祏之基永濟生靈之望

皇子位卑開啓安慰道場疏

西慈濟世本資助善之因東學敞宮適道以詒謀之慶啟妙筵於邃  
宇演密藏之真文具仗法乘永綏勝福

慶土開啓安慰道場疏

蘇子瞻

揆日灼龜既鼎新於改造伐材度土遂雲集以經營丁丁而勇於  
運斤橐橐而勞於縮版雖不經於衆口慮有取於神恫幸銷覆  
壓之虞允獲躋寧之碩原其所賜敢昧於神是用命海角之維那資  
大雄之妙蔭宣此五福之教慶乎百堵之成伏願天雨千花薰太  
和於一切佛塵萬黑精遐福於無邊百穀豐登羣生怙泰上祝河  
沙之聖壽永瞻惠日之祥光輒罄誠心庶祈靈監

百神有相致大厦之斯成一國觀新潔盛儀而圖報因命祇園之  
侶廣宣且竺之文音勇海潮花紛天雨今則誠心已格妙果斯圓  
祈法力之有加保皇圖而永固物無疵癘民用平康仰惟在上之  
尊垂監由中之信

奉宸廟修造開啓道場疏

御府所頒珍奇素積禁楹之燒風雨多傷適緣役事之興特啓法  
乘之會庶資妙力允集多祥

越國公主宅再上開啓安慰道場疏

竺筵締果廣福利於法門魯館降嬪鍾愛慈於皇室消臨嘉序就  
袂邃楹作清淨之道場禮光明之妙相庶憑慧力常擁嘉休

紫宸殿開啓祈雨道場疏

淑律過中驕陽作沴嚮歸慈於梵席靳濟望於農疇而密雲雖興  
膏澤未應念歲事之如灼袞宸塗而載嚴尚冀至心之通終垂能  
力之助

紫宸殿開啓謝雨道場疏

驕陽作沴其澤愆時爰袞禁宸載崇梵席蒙應如答降滋及期  
仰信覺慈庸申美報

集英殿開啓祈雨道場疏

自春涉夏陰陽鬱并雨佛降滋至于害歲嗣膺丕統佳勞如焚有  
覺大慈力隨普應

集英殿開啓謝雨道場疏

驕陽作沴潤澤愆期爰袞禁塗夙崇梵會至誠如答不日榮滋歸

信能仁用虔美報

集英殿開啓祈雨道場疏

方夏長物雨弗降滋嘉種用傷歲時安仰乃被祕殿歸崇妙緣庶  
興能仁徧澤羣生

九龍堂開啓謝雨道場疏

興雲上漢神化莫形油然垂陰膏潤萬物潮音振坐大啓法筵締  
果謝成益期豐稔

西京無畏三藏前開啓祈雨道場疏

方春甫作雨弗降滋歲事將虧羣心如灼大慈濟物應現無方油  
然興雲以澤萬物

西京無畏三藏前開啓謝雨道場疏

春陽隔并時雨憊亢夙祈慈力善濟涵生俄天澤之應期實邦氓  
之慰望爰憑妙果庶蒼靈休

集英殿開啓祈雨道場疏

驕陽薄陰秋氣未附密雲留雨農疇靡滋結祕法於靈場假能仁  
於溥界默回嘉應大澤羣元

集英殿開啓祈晴道場疏

方秋之中淫雨暴至害于嘉穀民咨無聊碩守邦圖內懷慘結歸  
信覺力轉沴為祥

泗洲普照前開啓祈雨道場疏

春夏之交雨不時降宿麥將悴民咨無聊碩守邦圖永思啟咎大  
慈濟物通于至忱弭沴為祥期布嘉澤

相國寺開啓祈晴道場疏

夏秋之交淫雨作沴廬舍昏熱下民無聊大覺無方應現起福消  
伏陰晦以道嘉祥

西京三藏前開啓祈雨道場疏

秋氣已肅亢陽薄陰槁木盈疇民望如灼大慈覺世通于至忱油  
然興雲徧澤嘉植

相國寺開啓祈晴道場疏

仲秋戒節暴雨為災蒙慧方之普通感沴陰之旋釋言念有生之夥率繫能覺之仁維厲至忱用疇嘉應

集英殿開啓祈雨道場疏

秋籥適中天未降澤農疇皆槁民將遇饑敢載被於禁楹庸嗣膺於梵席終蘄惠力溥濟含生

集英殿開啓祈晴道場疏

秋氣方中積陰肆沴天降淫雨害于染盛民之無聊愁困於下碩纂丕序疚心靡寧歸信覺茲幾獲善應

左右相為民祈晴道場疏

積陰為沴降水非常憫近甸之無羊懼下民之失職及躬省咎蠲慮致精終歸大覺之慈永保涵生之乂

集英殿開啓祈雪道場疏

大冬薄歲溫氣乘陰竊循天沴之來專儆君臨之失及躬是懼終食靡寧載祗被於靈場庶妙施於慧力早變同雲之族終凝密霰之祥

國忌資薦

宣祖忌辰道場疏

王岐公

神功被世實開帝運之基法御賓天須仗佛因之薦 宣祖皇帝勃興景烈垂裕燕謀導積累之深仁濟艱難之大業訓猷雖邈靈春如存 今皇帝紹宅休期追先憲陳常于夏於念斯文之功荷天之休永崇長發之禘載感諱辰之奉夙嚴梵供之脩 宣祖皇帝伏願受記真乘疑神寶坐灑甘露於法界燭慧燈於迷途 今皇帝伏願壽擬金輪福齊沙劫席皇圖之綿固納美俗於熙寧然後願鼎路同寅戚藩一德上屬雲天之會下窮海寓之幽凡暨涵生普密勝力

順祖忌辰道場疏

楊大年

山風流頌陳王業之艱難梵澤垂文降福祥之孚祐諱辰甫及沙

果宜憑伏惟 順祖惠元皇帝蘊上聖之資累元功之茂詒孫謀而及遠啓天命之來符 今皇帝奉清明之宮薦馨香之德啟仁祠之淨土翻文佛之祕詮 順祖惠元皇帝伏願寂並真游高臨覺地集祥綿緒敷鄉羣倫 今皇帝伏願鴻筭後天至慈冒世萬寓臻於朴厚四極格於混同然後願台輔協恭宗圖繁衍日星順夫軌道忝稷滋於有年舉是令生悉登壽域

僖祖忌辰道場疏

李樂靜

積行累功肇啓千齡之運報本及始莫窮萬世之思方諱日之俯臨憑妙緣之上薦惟願證一乘法離六欲天挹仙聖於九清御神靈於四海本支相續與蒼蒼以長榮社稷愈安如瀆弥而不動

太祖忌辰道場疏

漢業開基夙契當天之運軒遊乘景載臨猷代之辰預即仁祠大脩法供超神寶界自離五豎羽之根垂裕皇圖更衍千齡之慶

太祖忌辰道場疏

受命開基肇應列精之運奉先追孝聿崇覺力之因爰屬諱辰大修法會具嚴蒲塞之供徧釋貝多之文庶集勝緣仰資升濟

太祖忌辰道場疏

歐陽永叔

受命開先肇基興運昭祖功而不顯綿寶祚於無疆用深追遠之誠式奉明齋之薦載嚴淨刹以集善因伏願覺力常資威靈如在延鴻宗祐集慶妙冲庶邦咸被於餘休品物共均於博愛

太祖忌辰道場疏

盛烈當天基皇圖於億載大雄濟世殖善利於羣生屬載歷於諱辰用大修於法供庶嚴勝果益道厚祥

太祖忌辰道場疏

歐陽永叔

紹百王而開統昭著於祖功植衆善之妙因爰憑於覺力循有邦之舊典稽諱日以先期載肅齋場並延淨侶瞻玉毫之具相誦貝牒之靈文仰依慈惠之仁遐薦清真之馭庶資冥福式廣孝思

太宗忌辰道場疏

李樂靜



繼志圖功廣規摹於萬世與文偃武混夷夏於一區流澤被乎子孫餘烈照於天地百神幽贊四海永懷載更厭御之辰肅展事存之禮敢憑妙果仰薦真遊伏願超最上乘作無量福皇家繼緒如吐於千花法界含生長澤於一雨

太宗忌辰道場疏

楊大年

至大之德列原廟以推尊無量之仁依覺皇而薦祐 太宗皇帝恩淪四外運紹再傳化治之光在人昌明之慶垂後 今皇帝永思先烈濬發精誠有來淨行之流聿修祕藏之妙 太宗皇帝起游真界廣覆羣靈慧如日之圓明化等空而常寂 今皇帝伏願壽年山固聲教天臨儲嗣寢蕃宗枝弥盛空路協恭而贊輔霄躔應候而恭和庶績順時百嘉遂性

太宗忌辰道場疏

楊文公

軒遊已遠百年方仰於威神堯曆惟新萬乘弥深於孺慕每屬上仙之日益懷罔極之悲是崇衆善之緣式廣因心之孝伏惟 太宗皇帝握樞御極恭己臨民耀神武以混車書體至仁而懷動植焦勞致治早鍾厭代之期錫羨貽謀光啓卜年之祚 今皇帝允膺帝籙誕擁天休紫壇降升配之儀清廟苴苴不祧之典粹容載穆聿嚴如在之靈諱日俯臨更極以時之感爰就布金之地仰瞻被袞之儀四象翹誠千官就列遵竺乾之教修香積之齋用憑供佛之良因以奉在天之神駕 太宗皇帝伏願高居智地常御寶乘證大梵之尊嚴俯祐三千之界福丕圖於悠久彌昌億萬之年 今皇帝伏願八表歸仁百靈薦祉西清聽斷垂裳臻大定之期東岱告成探策表無疆之筭然後願黃扉良弼益光咨嶽之謀朱印茂親克保維城之訓四氣咸均於嶰谷五兵永戢於靈臺凡居普率之間共樂淳熙之化

真宗忌辰道場疏

歐陽永叔

仙馭乘雲式臨於遠日春陽濡露載感於孝思爰即梵居俾延淨侶瞻玉毫之妙相啓貝牒之真文集此勝因仰資冥祐

真宗忌辰道場疏

神遊斯遠方仰於軒威諱日茲臨載深於追慕虔依正覺俾集善因啟禁殿以有嚴啟法筵而夙設仰祈冥助用慰孝思

真宗忌辰道場疏

紫極收神永悼六飛之駕靈宮追福式研衆妙之門恭惟 真宗皇帝仁洽九圍道超千古奉綠圖於翠水封玉檢於石閣脫徒之期遠游於僊嶽遺弓之感空慕於塵寰 今皇帝明篤孝誠通祇聖則載履徹音之旦重深濡露之思是用宣九清之祕文資三洞之直果 真宗皇帝伏願儲精玉境度品珠臺永保在天之靈下綏卜世之福 今皇帝伏願撫國長綏納民太和躋聖德於日升等帝齡於天覆然後願蔭周群辟長扶鞏固之基樂及含生盡沐希夷之化

仁宗忌辰道場疏

李樂靜

大德宜民共席天雲之覆庶邦懷惠更深河洛之思垂衣拱手閑燕於四十年餘烈遺風扶持於億萬世碩直遊之雖遠宜昭報之不忘躬啟法筵上資福地惟願六通自在萬行圓成入非想天放光明於寶坐以本願力遍功德於河沙子孫承不接之基廟社庇無疆之福

仁宗忌辰道場疏

聖業垂鴻覆及眇躬之御僊遊趣駕迅驚流景之遷撫過樂之初辰即棲真之列宇茂敷冲式欽繹靈文庶薦妙於層虛益後祥於多祚

仁宗忌辰道場疏

妙道難名至神獨粹宅靈觀而在上垂博濟於無私當淑春之抄辰紀文考之諱旦虔依靖宇申繹冲文異收金籙之緣助介玉虛之祐

仁宗忌辰道場疏

僊輿上漢莫追靈駟之遊寶藏緇文夙下神龍之聽感露濡於春

抄紀音過於海隅庶證果於上乘益超神於真際仰申遐慕陰祐  
熙圖

英宗忌辰道場疏

駟隙馳光忽履撤音之旦龍華薦會廣資締佛之緣庶乘大覺之  
方自悟至真之趣超神絕境垂裕昌圖

英宗忌辰道場疏

僊輿厭代氣序如流梵席薦因津梁彼岸斷羣迷於非見應諸  
福於有緣大廣法乘往資超識

英宗忌辰道場疏

賓天不復莫窮仙馭之遊應物有緣須仗佛勝之果屬撤音之初  
旦結眾善之法筵庶證念於真空益助厥於超識

英宗忌辰道場疏

僊雲忽駕莫窮絕景之遊春露向儒載歷撤音之旦即棲神之祕  
宇經象帝之真旋庶嚴往升跡裕後祉

英宗忌辰道場疏

王岐公

春露載零悵流陰之易改宮輿晚駕追軼景以何從望仙寢之遺  
儀倣祇園之法會庶資升趣益侈後祥

神宗忌辰道場疏

痛龍髯之中斷未盡哀號感春露之既濡已臨諱日神遊浸遠塵  
世何知頌白晝之不留即金仙之往扣伏願聞一音之真妙滅諸  
念於往來超最上乘得無漏果寶幢香象長為天上之遊法雨慈  
雲更作人間之福

祖宗忌辰道場疏

蘇子瞻

至德難名已立配天之極孝思永慕蓋有終身之憂惟是佛乘庶  
資冥福屬弓劍上賓之日就衣冠出游之庭虔設淨筵俛嚴勝果  
庶超真覺永庇含生

聖宋名賢五百家播芳大全文粹卷第六十六卷

聖宋名賢五百家播芳大全文粹卷第六十七  
疏

國忌資薦

禁中安奉

祖宗御容道場疏

王岐公

顧以瓊涼承于基序敞西清之祕宇奉列聖之容衣載嚴佛果之脩以助僊遊之果仰懷丕列彌惕孝思

禁中安奉

仁宗御容道場疏

神遊日遠醉像天臨將陳法衛之儀住宅靈宮之祕會緣四衆證法三乘庶憑真諦之文仰助遐登之果

仁宗開啓百日道場疏

雲輿獻代歛驚御氣之遊蓮宇繙經具薦離塵之果先皇帝伏願超神十地燕景三清證圓滿之化身達慈悲之妙觀永依佛趣長佑邦圖

仁宗百日開啓道場疏

仙輿厭代晦朔如流梵席薦因津梁彼岸即大昕之正宇陳法供於諸天庶輯妙緣以嚴去識

仁宗小祥開啓道場疏

神機厭代僊御賓空忽驚歲筭之周空結宸衷之慕夙嚴祕宇崇建梵筵仰資慧境之遊垂錫皇圖之羨

仁宗大祥開啓道場疏

仙衛登真莫返乘雲之馭喪虜終制裁驚馬濡露之辰啓清會於仁祠薦妙因於慧境仰助在天之德益垂有國之休

仁宗大祥開啓道場疏

湖龍促駕莫追層漢之遊隙駟流陰歛及再暮之慕爰即寶瑋之所載宜密藏之文具薦精因仰資去識

英宗二七水陸道場疏

爽德在天空結遺氓之慕大雄出世普隨涵識之緣瞻金色之妙儀倣龍華之法會庶資覺力仰助遐升

英宗百日道場疏

仙輿趣駕莫攀上漢之游宮隙流陰遽及踰時之慕建妙儀於別境摹法會於諸天庶格精因更資遐陟

神宗小祥道場疏

李樂靜

帝鄉孰在莫返神遊日軌不留已成周歲恩涵萬類哀動庶心恭惟神宗皇帝聰明睿智之有臨禮樂政刑而不悖天人和協宗廟妥安雖堯帝之功獨資於神聖而文王之壽終損於憂勤永辭萬國之依遠歷四時之變玉音未遠龍馭何追抱鼎湖之弓潛烏流涕望裕林之柏森以成行敢薦妙緣少伸哀祝伏願證一乘法離六欲天挹仙聖於九清御神靈於四海乾坤日月共扶不拔之基社稷子孫永茂無疆之福

神宗小祥道場疏

龍去鼎湖莫返登遐之馭律回姑洗奄當厭御之辰躬啟梵筵仰伸孺慕惟願六通自在十地圓成離有想天不墮金輪之果超極

樂界長瞻月相之尊本支永庇於慈雲廟社共依於法力

神宗大祥道場疏

東坡

密旨如昨新穀再升望山馭於帝鄉陳法筵於淨宇人天來會共修最勝之緣梵釋同游永錫無疆之慶

神宗齋疏

李樂靜

龍去橋山帳乘雲之已遠天崩祀國縱頽骨以何支悲動百神哀纏萬國恭惟 大行皇帝道躋曠古澤被生民焦心勞思幾至於二十年崇德廣業將垂於億萬世四方底定百度緝熙未能燕息以隨時終以憂勤而捐壽遠辟宸極長往帝鄉碩丹鼎之悲涼空餘塵跡望鈞天於恍惚宛隔神遊仰集勝因少伸孺慕唯願證一乘法離六欲天挹仙聖於九清御神靈於四海乾坤日月共扶不拔之基社稷子孫永庇無疆之福

年節資薦

仁宗道場疏

王岐公

上賓之馭容衛莫瞻西向之丘威神空在願昊天之日報感春露之載零爰集梵因更資超識

冬節資薦

仁宗道場疏

寶燭導和載感踐長之節仙峯駐景莫追御歛之遊即西洛之神宮建五天之法席庶憑妙果益助遐登

十月旦太后資薦

英宗道場疏

仙輿不復歲籥荐移瞻神復以非遥感寒風之又至庶憑妙果永助遐升

十月旦資薦

神宗道場疏

東坡

橋山永望莫瞻弓劍之餘陽月載臨徒增霜露之感昭延淨衆崇建梵筵庶集勝因仰資真馭

冬至資薦

神宗道場疏

聖神陟降釋梵後先適更來復之辰茂薦往生之福虔修淨供仰道直游

十月旦資薦

仁宗道場疏

王岐公

冬簷之初寒風忽至橋山之下僊馭難留陳法供於梵筵奉遺儀於神寢庶憑大覺之果或助上賓之遊

王旦資薦 神宗道場疏

東坡

乘黃屋以上賓莫追風馭抱烏號而永慕再歷春朝敢仗勝緣式開淨供仰頌義堯之德永追梵釋之游

十月旦資薦 英宗道場疏

王岐公

鼎湖仙去愴遺景之莫留栢復寒生感流陰之忽暮倣三天之法供導諸佛之真筵異席妙因用嚴升趣

下寒節資薦 神宗道場疏

東坡

甚雨疾風感春律之將變鑽燧改火悼喪期之不留爰啟淨筵以資冥福願登大覺永濟含生

乾元節資薦 仁宗道場疏

王岐公

仙輿促駕莫追御歛之遊歲籥移陰載感流虹之節即神丘之下館做法會於諸天庶集妙緣用資超識

太上皇小祥功德疏

瑤池宴罷翠華方返於西崑荆鼎丹成列辟遽悲於遺劍適屆小祥之節彌深綿宇之思恭就祗園大誦祕典伏惟 尊號皇帝粹容如在仙仗匪遙乘般若之殊因同道遙於淨界神歸兜率永參釋梵之遊心輟娑婆更錫臣民之祉聊効涓埃之微烟庸伸葵藿之卑誠

章獻明肅皇后忌辰道場疏

李樂靜

北郊薦服已推配日之賢南向抱孤更極輔天之力憂勤致理慈愛及民屬諱日之載更仰徽音之如在敢憑薰唄上祝莊嚴伏願入觀止門超真乘於十地以威神力扶洪業於萬年

孝明皇后忌辰道場疏

雲衣縹緲頤羽駕之何追寶宇深嚴想徽音之如在俯臨諱日恭啟法筵伏願三十六天直超無上千萬億劫不墮有情生靈共濟於慈梁社稷長依於福海

文懿皇后忌辰道場疏

王岐公

旋九天之馭已邈於徽音倡諸佛之詮是馮於勝福 文懿皇后躬肅雍之德稟柔順之儀助正道於先朝留深慈於後廟 今皇帝緬追遺懿明發孝思載蠲常樂之辰式仗度門之薦 文懿皇后伏願乘二梵之果超羣生之迷灑甘露於神天妙大雲於法界 今皇帝伏願皇圖日赫聖業天隆鼓中龢於萬靈一教於殊俗 然後願台躔永耀宗葉長榮盡有相於幽明享無邊之威力

元德皇后忌辰道場疏

楊文公

伏以堯門積慶適鍾聖母之祥佛國往生更賴法王之力屬忌辰之斯屆痛仙馭以難追伏惟 元德皇太后沙麓炳靈塗山毓德紀徽猷於彤管美播聲詩伸嚴祀於闕宮禮崇孝享 今皇帝表懷顧復深念劬勞感昊天罔極之恩崇淨土有為之果每值上遷之日克修眾善之因瞻十力之慈尊會五天之梵眾載嚴佛事式奉神遊 元德皇太后伏願聞法靈山棲真內院念超三界高臨解脫之方智入一乘早證摩耶之果 今皇帝伏願金輪永固寶曆彌昌武庫彙弓見遠夷之率服仙衣拂石同聖壽之延洪然後願藩屏磐維固本枝於百世樞衡鼎鼐平縣象於三階群官及効於忠貞萬姓咸躋於仁壽

明肅皇后忌辰道場疏

仙遊不復載臨奉諱之辰慧果無邊益助超生之識碩慈儀之終闕悼宸慮之永思仰乘諸佛之筌陰祚有邦之慶

惠明皇后忌辰道場疏

楊文公

神遊已遠方尊如在之靈佛事載嚴用植無邊之福爰及上僊之日聿崇眾善之因伏惟 惠明皇后積德詒謀流光錫羨長秋追號允鍾似續之祥清廟薦誠克茂吉蠲之禮 今皇帝運鍾下武義篤奉先祇荷宗祧永懷祖妣俯臨諱日誕舉國章特就精藍聿陳淨供曾感德六和之眾瞻慈悲三界之尊庶憑金地之良緣克奉玉清之仙駕 惠明皇后伏願早蒙佛記常住天宮受百福之



莊嚴證一乘之解脫配食永隆於朝貌上年更祐於邦家 今皇帝伏願位固金輪功周沙界五兵不試盡銷楚鐵之英万壽無疆益茂莊椿之筭然後願列藩荷寵更隆般石之基當國輸忠永著和羹之効百辟咸傾於誠節萬民共樂於升平凡君履壽之間同被文明之化

章獻明肅皇后忌辰道場疏

王岐公

軒宮淪耀再丁過密之期彤管流音空詠思齊之美啓丹臺之法會緇藥笈之靈文庶味妙宗益資遐舉

簡穆皇后忌辰道場疏

揚大年

聖心追遠仰瞻如在之靈佛事崇因式薦無邊之祉屬臨諱日舉集勝緣伏惟 簡穆皇后道茂坤儀德昌王業克協曾沙之慶誕昭彤管之華懿矩彌芳徽音載邈 今皇帝紹隆景祚奉若仙猷仰真馭之彌虔罄孝思而無斃聿遵典著虔奉齋修 簡穆皇后伏願悟證上乘超登無垢具慈因於十號佑華且於千齡 今

皇帝伏願聖德誕敷仁風不冒七政齊而協曆九功叙以咸歌永保無疆之休茂治重熙之化然後宗英輯睦道固維城良輔弼諧功宣作礪燭声教於率土書瑞應於曲星

昭憲皇后忌辰道場疏

揚大年

仙駟上賓邈靈遊而遂遠星龍綿合儷遺範以如存式臨奉諱之辰欽薦無疆之祉伏惟 昭憲皇后歆祥聖武宅順坤儀首基椒極之華參翊蘿圖之永懿猷茂建柔化不昭悟真諦以馭神衍慶謀而垂後 今皇帝永懷徽則介助真詮悵先忌之環經凝孝思而叢感祓除金地披繹寶文旅華裊以巡香儼珍羞而侑供異馮惠果上續勝緣 昭憲皇后伏願法露普流慈雲周蔭宴居淨界常為十號之證明願在朝家彌極九皇之高治 今皇帝伏願奉承鴻緒增鞏不基絕瑞高符交天人而相其尊名盛德煥日月以常新四序順成八風和布臺師偃戢原稼曲且甘然後願磐石英藩永茂維城之業乾台哲輔益隆黻黻之勳官師胥協於忠良黎

獻並躋於仁壽

元德皇后忌辰道場疏

葛侍郎

貝葉旁行存誠西竺琅函隱韻歸命叢霄輒憑二教之直登仰助一靈之飄馭 元德皇后伏願力持法印永庇道林悟就鸞嶺之上乘作龜臺之仙伴佛土三千界親覲世尊玉京十二樓遍遊仙境垂水寢宇錫羨皇圖

章懷皇后忌辰道場疏

葛侍郎

俛天作合配媯汭以流芳濡露感時供緇黃而追福 章懷皇后伏願圓融根境領悟希夷聞佛音於玉毫之前受法錄於瓊章之上法航大濟見慈氏於龍華羽駕超升友神人於姑射

隆祐皇后首七水陸道場疏

汪彥章

慈壺興災仙游厭代既徽音之永隔非真諦以疇依 大行隆祐皇太后伏願頓悟三乘坐超十地如明灯焰千薪傳而千處不窮若大海流一滴入而一功無異證成佛果敷佑邦圖

隆祐皇后二七道場疏

汪方章

慈闈棄養永纏隙駟之哀仙馭升遊俄閱親蠶之候爰即椒塗之地恭繡貝葉之文憑仗勝因增崇冥福用東朝之積慶契西竺之真詮

隆祐皇后六七道場疏

厚德遺基永峙山河之載仙遊歛駕徒驚日月之流爰陳蒲塞之羞并集毗尼之衆闡揚海藏滿袂世氛庶啓在天之靈即登成佛之果

昭慈獻烈皇后卒哭道場疏

徽音浸遠晨昏復見以無期喪紀敢逾哭踊自茲而有節即長樂巖凝之地闡祇園秘密之文仰祈如在之靈即證無生之果

昭慈獻烈皇后几筵道場疏

迅景莫留隆冬俄及瞻玉衣之在御驚鷄總帳之生寒爰即禁楹普作人天之供庶扶慈極永從帝釋之游誓首覺雄垂心冥祐

昭慈獻烈皇后啓殯水陸道場疏

馳駕登遐莫盡飾終之報龍輔在御將臨先遠之期爰稽梵釋之  
之文溥作人天之供徼福萬緣之會歸誠兩足之尊仰冀等慈  
潛伏精誠悟總持於妙湛用升濟於神明

隆祐皇后水陸道場疏

天禍禁闈世亡慈極徒哀迷而失次念追報以無前惟仗真乘庶  
增冥福悟無明之種子乘大覺之津梁願力所覃神基斯固

昭慈獻烈皇后水陸道場疏

羨道既封雖山川之在望虞牲屢薦為悵日月之如流恭命苾芻之  
徒普羞蒲塞之供仰祈法力陰導神游同知見於覺皇錫休祥於  
不祚

昭慈獻烈皇后中元水陸道場疏

塵拚宮衣理莫回於長夜涼生陵栢時奄及於新秋當必芻自恣  
之辰陳蒲塞無遮之供仰祈法力永導仙遊集諸福於人天隕餘  
祥於宗社

文懿皇后追薦道場疏

楊大年

闕宮嚴奉尊藏主之遺靈香刈追嚴悼捫天之遠駕伏惟 文懿  
皇后德侔厚地慶協曾沙早正號於中闈尚留勞於彤管 今皇  
帝感慈訓族昭孝厚民厲諱日之聿臨企真遊而永慕大營蒲塞  
之饌遐薦飛颺之輪 文懿皇后伏願足履紺蓮神棲寶網而禮  
薄迦之相坐證三乘劫拂淨居之衣用綿百世 今皇帝伏願福  
量如海壽躋等山廣錫羨於本支彌昌異業導宅鴻之祺祉大  
庇生民然後願宗邱茂親嚴節雋輔交著弼諧之績同均凱樂  
之宜官師咸竭於忠圖夷夏率宗於叡化

明德皇后中祥道場疏

楊文公

丙殿上僊四氣俄周於歲律祗園薦福一人方極於孝思是崇出  
世之良因以奉在天之神馭伏惟 明德皇后高后襲慶沙麓儲  
祥作合神宗二紀式隆於陰教居尊長樂萬方同仰於母儀俄運

逼於真遊固哀深於哀極 今皇帝至仁守位盡禮事親慶方洽  
於承顏悲忽纏於曷恃家邦異制勉遵易月之規霜露永懷彌切  
因心之感玄寢已終於遠日忌辰爰及於中祥特就精藍虔修淨  
供會南洲之開仕崇西竺之妙緣庶憑大覺之深慈克證上生之  
聖果 明德皇后伏願寶乘悟法花界棲神受佛記於雙林福皇  
圖於百世 今皇帝伏願萬靈薦祉千聖垂休壽考無疆克協  
山呼之數千戈載戢永符海晏之祥然後願親賢毓德於懿藩輔  
弼宣猷於宰府羣后竭輸忠之効庶邦堅共治之誠凡居普率之  
間共洽升平之化

請疏

住持

請玉老住龍興疏

邵公濟

釋迦過去彌勒未來當家絕之兩間孰收召於四眾玉公躬復具  
戒廣翻秘言初說臨江之禪若契臨濟之事眷茲故壘舊數精廬  
久羣笑於狐狸輒擯斥於龍象掃除去露靈鑿手興起發勇猛心  
削牘以聞奉制曰可天堂再敞重現光明之拳丈室既成徧容高  
廣之坐屬茲開士越彼稠人果誦義之有歸須當仁而不避出贊  
歎之妙語用光華於淨坊

請湛老住崇寧疏

晷无咎

大圓頓教不以世求妙淨明心不緣他悟既衆生本來成佛則祖  
師何以爲人皆由流轉塵勞多生認賊所以顛倒迷悶終日怖頭  
有大智人緣在震旦面壁无語不妨滿谷清風隻履西歸依舊一  
天明月雖它方之已熟眷此土之未敷 今皇帝陛下紹述聖猷  
嗣隆法寶合百工歸美之意建萬壽崇寧之名妙喜繁來化成  
跳出是用騰封章而有請屈道德之肯臨恭惟和尚受祖祖心提  
方方印等慈不擇貧富任運无有東西視不見聽不聞在三藏鼻  
孔上立遇者死當者壞從德嶠棒頭出來願垂悲憐副此翹竚不  
用變生作熟自然識路知家以不盡灯度无量衆葛藤具斷阿  
誰縛汝來皮髓兼忘那箇是不精底上資眷弄永洽純熙旁球

民生普離菑咎

請圓老住教院疏

孫仲益

如來超最上乘初無言說佛子慎无始劫久住輪回閱諸一切有情當為衆生說法某人讀書悟斷輪之妙談空契投芥之機面壁九年已忘言語道彈指千偈猶現句文身指彼岸之津梁示羣迷之領袖墻壁瓦礫皆具法音龍天鬼神遍作花雨

請密老住玉屏疏

虞推甫

何佛無因且說法身報化是山有寺不論見在去來况開山建無礙道場傳佛正法眼藏不逢妙覺孰憫羣心共惟某禪師開自在門行真實諦身如青蓮出水有塵莫汗心同白月行空无跡可踐興精藍於臺壘弊荒頽之後成大藏於笑談指頽之間交驩者千萬人害成者二三子載清風而歸去為勝地而鼎來山間草木欣欣不知春力庵裏雲雷長闊闊溥接初機增光玉屏山願升寶蓋座

請妙印大師住龜潭疏

孫仲益

一世解鑿尚存馬鬣三歸集福今在龜泉伏惟某人舍衛國之比丘祇陀林之上首安心得法隨處現身九節烏藤去作閑雲之伴一丘黃壤佇霑法雨之滋

請印老住小岩疏

邵公濟

貝闕珠宮自菩薩龍所避瑤堦金地為阿羅漢所居必極西方之流故堪東道之選伏惟印老和尚舌根茹蜜有花木香襟懷挾冰无塵土氣操節凜金石之異言語如雲霞之姿已堂堂而經竒但寂寂而理照若同淨業數眷老夫勅書閣下接太一真人吏隱山間近第五尊者睇林泉之勝踐適巡管之上遊閱平生之故交在舉世之開士亮出處之母必莫然諾之未忘訶佛進佛場中想四衆之避席將母慈母岩下尚千載之上隣

請悟禪師住興化疏

陳无已

南北不異禪律相資曲士拘文起差別於耳目至人達觀示平等

於寃親不有別傳孰開異見某公尊者永佛受記爲世導師紹  
雲門之正宗分慧林之半座望破頭之氣知正法之傍行觀優曇  
之華信異人之間出知時莫逆觀化方隆毋辭千里之行以慰一  
方之望

請普老住太平

李元應

久饗太平老子向无孔笛中吹个曲解嘹唳太清惟三世諸佛拍  
得是六代祖師和得徹和山鼓應得就道吾舞得成若向宮商角  
徵中求今已搓過去也行遍大唐國知音能幾人况武信未爲陋  
而廣利久虛法席鬧市子裏三家村中恐有半箇人聽不以耳幸  
師命駕

請正老住廣孝

寒山無心自是豐干饒舌馬祖多事堅要黃梅出山這聖箭子昔  
曾透過九重城汝鈍根師何嘗夢見六代祖况趙州老大漢住處  
未知那臨濟小厮兒具眼有數試看朝生鳳子解接老去驢年惟  
振禪師具潮外音同水中月當時行脚懸知我子天然今日還家  
正謂老婆心切接得青原斧子踢倒百丈爭瓶雖短小而舌至梵  
天能圓融而量鄧沙界堅起拂子這妙月西天亦無吹動布毛箇  
佛法此間也有真菩薩子現宰官身知廣利之叢林非野狐之窟  
宅善濟塔下觸日苦提蘭陀菴中通身般若本自頭頭具足鷓鴣  
啼處野花香不妨處處圓通燕子歸來深院靜牧笛嘔啞非是曲  
聽取一曲太平歌

請嘉州密老住宜黃梅山疏

公翕起予

嘉州石像擎天作麼蓋藏陝府鐵牛下口不勞吞吐既有隨身之  
竿木要施鍛佛之鉗鎚振曹洞已墜宗風判祖禰未了公案會有  
達識成此妙緣密公長老宿植道根深得法髓乃枯木之的正正  
芙蓉之遠孫敲唱俱行躡用金露斷三種之滲漏辨五位之正偏  
迹隱叢林名高海嶠適有宜川之上利實爲臨汝之勝游輒枉巾  
瓶來臨巖巖壑桃花見後不須過眼疑生梅子熟時切忌當頭問着

勉從衆請幸勿固辭

請恩老住蔣山

張安國

陝府鐵牛脚力負萬鈞之重石霜角虎眼光搖百步之威欲轉無上法輪須還本分尊宿恩公長老禪師一生打硬四海知名揚岐棘栗逢當仁不讓國師無縫塔此義卻諳截斷衆流壁立千仞乃眷鍾山之勝地實際圓悟之昔游俗駕初回潮音未振考之公論僉欲師來拗折竹單且與逢場作戲橫擔拄杖直須覲面相呈稽首妙華王請祝聖人壽

請趙居士住觀音院

陳無已

觀音古刹地聖人凡賴上名都信深緣熟是興無盡之供用開大施之心趙君居士見遠察微有家無累悟解不立已契祖師之禪悲願未終更廣衆生之福憑茲一舉以効初心

請凝藏住天宮院

鄭伯敦

牢落數椽在梅江之開市端居一席須茶苑之名流疑公長老純白天資孤高道巧毗盧寶藏曾是護持堯率夫宮何方坐斷看曇花之初出祝蘿祚之無疆

聖旨請聞老住徑山

黃花翠竹是山皆有道場拍板門槌到處堪呈戲具眷徑山之勝旣實寶刹之善因法席偶虛當人誰屬恭惟聞公長老丹霞敵手枯木親孫一口吸盡西江四蹄踏殺天下得正眼法爲勝沙門酌不竭而注不盈窮益深而測益遠空心及第豈偶然哉垂手於人無不可者共慶人天之會遽邀龍象之來

請珪老住黃山

翁起予

輓毬拍柏當面執瞞擊竹捲簾遭人冷笑現成公案不勞忖怛商量本分作家別請斬新拈出珪公長老早携龍門之法印出總虎溪之道場意氣高壓諸方見解平欺千聖拈槌豎拂不惟截斷衆流鏤月雕風更能游戲三昧矧黃山之勝境實緇侶之上游猊座久虛雷音未振願徇人天之請覲同龍象之來敲開祖佛頂門拽

轉衲僧鼻孔上資履弄俯慰九情

聖宋名賢五百家播芳大全文粹卷第六十七